

ԿՈՍՏԱՆ ԱՐՏԱՎԱԶԴԻ ԿՈՍՏԱՆՅԱՆ

75 - ԱՄՅԱԿԻ ԿԱՊԱԿՑՈՒԹՅԱՄԲ

Լրացավ նշանավոր գիտնական, տեխնիկական գիտությունների դոկտոր, պրոֆեսոր, ՀՀ ԳԱԱ ակադեմիկոս ԿՈՍՏԱՆ ԱՐՏԱՎԱԶԴԻ ԿՈՍՏԱՆՅԱՆԻ ծննդյան 75 և



մանկավարժական գործունեության 50-ամյակը:

Կ. Կոստանյանը ծնվել է 1926 թվականի սեպտեմբերի 1-ին, Էջմիածին քաղաքում: 1948-ին ավարտել է ԵրՊԻ-ի քիմիկատեխնոլոգիական ֆակուլտետը, ապա ընդունվել Գիտությունների ակադեմիայի ասպիրանտուրան: Ուսուցումն անցկացրել է ականավոր գիտնականներ, ԽՍՀՄ ԳԱ թղթակից-անդամ Ն. Կաչալովի և պրոֆեսոր Կ. Եվատրոպևի ղեկավարությամբ, Լենինգրադի տեխնոլոգիական ինստիտուտում, որտեղ և 1952 թվականին պաշտպանել է «Նատրիում - կալցիում - մագնեզիում - ալյումինասիլիկատային ապակիների էլեկտրահաղորդականության կախումը ջերմաստիճանից և բաղադրությունից» թեմայով թեկնածուականատենախոսությունը:

սությունը:

Այնուհետև երիտասարդ գիտնականն աշխատանքի է անցել ՀՀ ԳԱԱ քիմիայի ինստիտուտում և ամբողջությամբ նվիրվել ինստիտուտի առջև դրված կարևորագույն հարցերին՝ հանրապետության նոր զարգացող ապակու արդյունաբերությունը տեղական հումքով ապահովելու և էլեկտրաէներգիան ապակու եփման համար օգտագործելու խնդիրների լուծմանը, որոնք նրա թեկնածուականատենախոսության տրամաբանական շարունակությունն էին:

Հետազոտությունների արդյունքները երկար սպասել չտվեցին. սկսած 50-ական թվականներից՝ Կ. Կոստանյանը համամիութենական խորհրդակցություններում բազմիցս հանդես է եկել հալված ապակիների էլեկտրահաղորդականությանը, ապակեկերպ նյութերի և ապակիների էլեկտրական հատկություններին նվիրված զեկուցումներով՝ արժանանալով լայն ճանաչման և մասնագետների բարձր գնահատականին:

Կ. Կոստանյանի գործունեությանը բնորոշ են գիտական բարձր մակարդակն ու գործնական նպատակաուղղվածությունը: Ապակու էլեկտրաեփման ուղղությամբ հանրապետությունում դեռևս 30-ական թվականներից տարվող աշխատանքներն ամփոփվեցին 1962-ին լույս տեսած «Ապակու էլեկտրաեփումը»

մենագրության մեջ, որը համաշխարհային տեխնիկական գրականության մեջ ապակու
լեկտրաեփմանը նվիրված առաջին գիրքն էր:

ՀՀ ԳԱԱ քիմիայի ինստիտուտի անօրգանական քիմիայի սեկտորի հիման վրա 1957-
ին կազմակերպված Ժողտնտխորհի քիմիայի գիտահետազոտական ինստիտուտում 1959
թվականին ձևավորվեց ապակու քիմիայի և տեխնոլոգիայի լաբորատորիան, որի վարիչը
դարձավ երիտասարդ, բայց արդեն լայն ճանաչում գտած գիտնականը:

Ապակու էլեկտրաեփման հայկական խմբի աշխատանքները 60-ական թվականների
սկզբներին արդեն միջազգային ճանաչում էին ստացել. այդ հետազոտություններին ու
դրանց իրականացմանը ծանոթանալու համար բազմիցս Երևան են եկել նախկին
Խորհրդային Միության, Չեխոսլովակիայի, Գերմանիայի և այլ երկրների հետազոտողներ,
ինժեներ-մասնագետներ: Պատահական չէ, որ այդ տարիներին հատկապես Երևանում էին
կազմակերպվում մի շարք հանրապետական և միութենական նշանակության
գիտաժողովներ:

Ամփոփելով հաված ապակիների էլեկտրահաղորդականության ուսումնա-
սիրություններին նվիրված իր գիտահետազոտական աշխատանքները՝ Կ. Կոստանյանը,
1968-ին պաշտպանեց □Հաված սիլիկատային և բորատային ապակիների
էլեկտրահաղորդականության կախումը ջերմաստիճանից և բաղադրությունից□ թեմայով
դոկտորական ատենախոսությունը:

60-ական թվականների վերջերին քիմիայի հետազոտական ինստիտուտը, մի շարք
գերատեսչական փոփոխությունների ենթարկվելով, կրկին անցավ ՀՀ ԳԱԱ-ի
ենթակայությանը, և ինստիտուտի մի քանի լաբորատորիաների հիման վրա
կազմակերպվեց ԽՍՀՄ էլեկտրոնային արդյունաբերության նախարարության
էլեկտրավակուումային ապակու գիտահետազոտական ինստիտուտի Երևանի
մասնաճյուղը, որի տնօրեն նշանակվեց Կ.Կոստանյանը: Մասնաճյուղի առջև դրված
բազմաբնույթ և կարևոր խնդիրները զգալիորեն ընդլայնեցին գիտնականի
հետազոտությունների շրջանակները. նոր գերմանատային և խալկոգենիդային,
կապարային և այլ ապակիների բաղադրությունների ու տեխնոլոգիաների մշակում,
սիտալների, ապակու ներկերի, թաղանթների, բյուրեղական նյութերի, մենաբյուրեղների
ստացում և, որ ամենագլխավորն է, գիտական արդյունքների ներդրում արտադրության
մեջ: Տեսական ուսումնասիրություններն առավել կարևորվեցին, երբ մասնաճյուղի
կազմում 1981-ին կազմակերպվեց փորձնական գործարան: Կարճ ժամանակում Կ.
Կոստանյանի ղեկավարությամբ մասնաճյուղն իր փորձնական գործարանով դարձավ
Միության՝ ապակու քիմիայի և տեխնոլոգիայի ուղղությամբ կատարվող աշխատանքների
իրականացման հետազոտական կենտրոններից մեկը:

Դեռևս 1955-ից Կ. Կոստանյանը կապված էր Երևանի պոլիտեխնիկական
ինստիտուտի հետ, որտեղ կարդում էր «Սիլիկատների ֆիզիկական քիմիա» դասընթացը:
Այդ դասախոսությունների հիման վրա 1967-ին հրատարակվեց «Սիլիցիումի քիմիա և
սիլիկատների ֆիզիկական քիմիա» ուսումնական ձեռնարկը, որով կրթվել է սիլիկատային
տեխնոլոգիայի մասնագետ-ինժեներների մի ողջ սերունդ: 1977-ին Կ.Կոստանյանը
ընտրվել է ՀԽՍՀ ԳԱԱ-ի թղթակից-անդամ:

Աշխատանքների կատարման հետ մեկտեղ, Կ.Կոստանյանի կողմից դաստիարակվում էր բարձր որակավորում ունեցող հետազոտողների մի խումբ, որոնցից շատերն արդեն առաջատար մասնագետներ էին: Կ.Կոստանյանի ղեկավարությամբ պաշտպանվել են 25 թեկնածուական ատենախոսություններ:

1984-1992 թվականներին անվանի գիտնականը եղել է ԽՍՀՄ ԳԱԱ-ի «Физика и химия стекла» ամսագրի խմբագրական կոլեգիայի անդամ, 1989-ին՝ Ապակու միջազգային XV կոնգրեսի կազմկոմիտեի, իսկ 1989-1992 թվականներին՝ ԽՍՀՄ Նախարարների խորհրդին առընթեր գիտության և տեխնիկայի բնագավառում Լենինյան և Պետական մրցանակներ շնորհող կոմիտեի անդամ:

1986-ից Կ.Կոստանյանն անցնում է մանկավարժական աշխատանքի, որպես ԵրՊի-ի քիմիկատեխնոլոգիական ֆակուլտետի «Միլիկատների տեխնոլոգիա» ամբիոնի վարիչ, իսկ 1992-ից՝ ամբիոնի պրոֆեսոր:

Այս տարիներին նա գրել և տպագրության է պատրաստել մի շարք մենագրություններ և դասագրքեր, այդ թվում՝ «Վենետիկյան ապակի» մենագրությունը և «Միլիկատների և ոչ մետաղական դժվարահալ նյութերի ֆիզիկական քիմիա» դասագիրքը: Կ.Կոստանյանը 1996-ից ՀՀ ԳԱԱ ակադեմիկոս է, ավելի քան 300 գիտական հոդվածների, գրքերի, հեղինակային վկայականների հեղինակ, միջազգային ճանաչում ունեցող ականավոր գիտնական, գիտության կազմակերպիչ և գիտական ղեկավար:

Այսօր էլ վաստակաշատ գիտնականն ու մանկավարժն իրեն հատուկ եռանդով ու նվիրումով շարունակում է հայրենանվեր գործունեությունը: Ներկայումս նա «ՄՀԿ»-ի շրջանակներում կատարվող երկու աշխատանքների գիտական ղեկավար է, ՀՊՃՀ-ի՝ գիտական աստիճաններ շնորհող 057 մասնագիտական խորհրդի նախագահը:

Տեղեկագրի խմբագրական կոլեգիան և բազմաթիվ գործընկերները, շնորհավորելով ականավոր գիտնականին ծննդյան 75-ամյակի առթիվ, մաղթում են նրան քաջառողջություն, երկար տարիների բեղմնավոր ու հայրենանվեր գործունեություն: